

四庫全書

經部

欽定四庫全書

周禮纂訓卷十八

安溪李鍾倫撰

戎右掌戎車之兵革使

使色  
吏反

注使謂王使以兵有所誅斬也春秋傳曰戰於穀晉  
欒駒為右襄公縛秦囚使欒駒以戈斬之訓按戎僕  
掌倅車之政則不獨革路而已五戎之政皆掌之戎  
右亦當然蓋五戎各有僕右皆統於此革路之僕右

也

詔贊王鼓

注既告王當鼓之節又助擊之

疏大僕已贊王鼓此亦同是助擊其餘面也

傳王命于陳中

傳直賞反  
陳直慎反

注為王言之大也

會同充革車

注會同王雖乘金路猶以革路從行也充之者謂居

左也曲禮曰乘君之乘車不敢曠左

盟則以玉敦辟盟遂後之

敦音對

注鄭司農云辟法也玄謂將歃血者先執其器為衆陳其載辭後之者傳敦血授當歃者

贊牛耳桃茢

茢音列

注尸盟者割牛耳取血助為之及血在敦中以桃茢拂之又助之也耳者盛以珠盤尸盟者執之桃鬼所畏也茢苦帚所以掃不祥

齊右掌祭祀會同賓客前齊車王乘則持馬行則陪乘

齊側皆反  
乘繩證反

注齊車金路王自整齊之車也前之者已駕王未乘之時陪乘參乘謂車右也齊右與齊僕同車而有祭祀之事則兼玉路之右然則戎右兼田右與

疏云前之謂王未乘時者曲禮曰僕執策立於馬前備驚奔謂未乘時

凡有牲事則前馬

注王見牲則拱而式居馬前卻行備驚奔也

道右掌前道車王出入則持馬陪乘如齊車之儀

注道車象路也王行道德之車

自車上諭命于從車

注自由

疏按馭夫掌馭貳車從車彼注貳車象路之副從車戎路田路之副此從車即彼貳車與從車也

詔王之車儀

注顧式之屬

王式則下前馬王下則以蓋從

疏蓋有二種一者禦雨二者表尊此則表尊之蓋也

大馭掌馭玉路以祀及犯輶王自左馭馭下祝登受轡

犯輶遂驅之

輶音跋  
蒲撥切

注行山曰輶犯之者封土為山象以菩芻棘栢為神主既祭之以車轢之而去喻無險難也春秋傳曰跋

涉山川詩云取羝以較聘禮乃舍較飲酒于其側禮家說亦謂道祭

疏此據祭天之時出國門封土為山象祭較按鄭注月令祀行之禮為較壇厚三寸廣五尺此道祭亦宜然云以菩芻棘栢為神主者謂三者皆可用為神主也引聘禮者大夫道祭無牲牢酒脯而已

菩音員

一音倍

及祭酌僕僕左執轡右祭兩軹祭軌乃飲

軹音止  
軌音犯



注軹謂兩轆也故書軌為範杜子春云文當如此或云當為軹軹謂車軹前也

疏此云及祭即上文將犯較時當祭左右轂末及軹前乃犯較去酌僕者僕即大馭云軹謂兩轆轆即轂末也云軌當為範者按少儀祭左右軌范軌與軹同謂轆頭也範與范聲同謂軹前也若然此云軹少儀作軌此云軌少儀作范也

凡馭路行以肆夏趨以采薺

薺才私反

注凡馭路謂五路也肆夏采薺樂章也行謂大寢至路門趨謂路門至應門

疏樂師亦有此法彼下云車亦如之即行趨據步迎賓客此既馭路亦云行趨者此雖馭路行趨遲疾亦推步迎賓客為法也注云路謂五路者以經云凡所含廣

凡馭路儀以鸞和為節

注舒疾之法也鸞在衡和在軾皆以金為鈴

疏鄭知鸞在衡和在軾者按韓詩傳云升車則馬  
動馬動則鸞鳴鸞鳴則和應明鸞近馬首和更近  
後也按秦詩云輶車鸞鑣鄭云鸞在鑣者鄭以田  
車鸞在鑣乘車鸞在衡此據乘車而言

戎僕掌馭戎車

注戎車革路也師出王乘以自將

掌王倅車之政正其服

倅七  
內反

注倅副也服謂衆乘戎車者之衣服

疏鄭注坊記云僕右恒朝服據非在軍時若在軍則服韋弁服衆乘戎車謂副車十二乘及廣闕革輕之倅皆是其服謂韋弁服

犯輶如玉路之儀凡巡守及兵車之會亦如之

注如在軍

疏巡守及兵車會亦乘革路若乘車之會即乘金路也

掌凡戎車之儀

注凡戎車衆之兵車也書序曰武王戎車三百兩

齊僕掌馭金路以賓朝覲宗遇饗食皆乘金路其法儀各以其等爲車送逆之節

注節謂王乘車迎賓客及送相去遠近之數上公九十步侯伯七十步子男五十步司儀職曰車逆拜辱又曰及出車送

疏春夏受贊於朝無迎法受享於廟則有之秋冬一受之於廟俱無迎法故郊特牲云觀禮王不下

堂而見諸侯是受賁受享皆無迎法今言朝覲宗  
遇饗食皆乘金路者謂因此朝覲宗遇而與諸侯  
行饗食在廟卽有乘金路迎賓客之法也上公九  
十步已下大行人文彼據受享於廟非饗食禮引  
之者欲見饗食迎賓與受享同司儀所云亦據受  
饗食之禮也

道僕掌馭象路以朝夕燕出入其法儀如齊車

注朝夕朝朝莫莫

疏朝朝莫莫在正朝來往而言燕者以其在宮中  
行事皆稱燕

掌貳車之政令

注貳亦副訓按顧命有先路次路注云先路象路也  
次路象路之貳但革路之貳疏謂有十二乘玉金象  
木之貳其數則未有攷耳

田僕掌馭田路以田以鄙

注田路木路也田田獵也鄙循行縣鄙

掌佐車之政

注佐亦副

疏天子戎車田車之貳有別名諸侯戎車田車之貳同曰佐無倖名是以檀弓云佐車授綏少儀注云朝祀之副曰貳戎獵之副曰佐也

設驅逆之車

注驅驅禽使前趨獲逆衙還之使不出圍

疏按王制大夫殺則止佐車彼佐車則此驅逆之



車也

令獲者植旌

注以告獲也

疏山虞植旗屬禽此又植旌比禽者共其事也

及獻比禽

注田弊獲者各獻其禽比種物相從次數之

疏凡田百姓所得禽大獸公之小禽私之公之者獻於旌下每禽擇取三十其餘為主皮之射而取

之

凡田王提馬而走諸侯晉大夫馳

注提猶舉也晉猶抑也使人扣而舉之抑之皆止奔也馳放不扣

馭夫掌馭貳車從車使車

注貳車象路之副也從車戎路田路之副也使車驅逆之車

疏不掌玉路金路之副者二者事暇蓋車僕不共

掌也知使車是驅逆者以使役勞劇之事故知是驅逆之車也

分公馬而駕治之

注乘調六種之馬

疏趨馬自主駕脫故知此駕治是調習之也

校人掌王馬之政

注政謂差擇養乘之數也

辨六馬之屬種馬一物戎馬一物齊馬一物道馬一物

田馬一物駕馬一物

注種謂上善似母者以次差之王路駕種馬戎路駕戎馬金路駕齊馬象路駕道馬田路駕田馬駕馬給宮中之役

凡頒良馬而養乘之乘馬一師四圉三乘為阜阜一趣馬三阜為繫繫一馭夫六繫為廢廢一僕夫六廢成校校有左右駕馬三良馬之數麗馬一圉八麗一師八師

一趣馬八趣馬一馭夫

來繩證反圉魚呂反阜才早反趣舍走反劉沈清須反下同廢

音救居  
又切

注良馬五路之馬四匹為乘師趣馬馭夫僕夫帥之名也趣馬下士馭夫中士則僕夫上士也自乘至廐其數二百一十六匹易乾為馬此應乾之筴也至校變為言成者明六馬各一廐而王馬小備也校有左右則良馬一種者四百三十二匹五種合二千一百六十匹駕馬三之則為千二百九十六匹五良一駕凡三千四百五十六匹然後王馬大備麗耦也駕馬

自圉至馭夫凡馬千二十四匹與三良馬之數不相  
應八皆宜為六字之誤也師十二匹趣馬七十二匹  
則馭夫四百三十二匹矣然後而三之既三之無僕  
夫者不駕於五路卑之也

疏按序官無僕夫故鄭以趣馬馭夫尊卑次之知  
僕夫上士也又按序官自師至馭夫中士二十人  
下士四十人并之六十正充此良馬之馭夫又不  
見駕之馭夫者或脫也訓按僕夫即五路之僕良

馬五廐重左右為十故序官三路僕皆二人道田  
二路並十二人者二路常乘事多或使之更代與  
天子十有二閑馬六種邦國六閑馬四種家四閑馬二  
種

注降殺之差每廐為一閑諸侯有齊馬道馬田馬大  
夫有田馬各一閑其駕馬則皆分為三馬

疏趙商問天子十二閑馬六種為三千四百五十  
六匹邦國六閑馬四種為二千五百九十二匹家

四開馬二種千七百二十八匹天子之卿食小都大夫食縣司馬法論之甸方八里出戎馬四匹長轂一乘今大夫采地四甸一甸給王餘三甸纔有馬十二匹與校人職相校甚遠何答曰邦國六開馬四種其數適當千二百九十六匹家四開二種又當八百六十四匹今子以何術計之乎此馬皆君之所制非謂民賦司馬法長轂一乘戎馬四匹此謂民出軍賦無與於天子國馬之數也按趙商



云邦國二千五百九十二匹者謂三良一良四百  
三十二匹三良千二百九十六匹駕三其一種亦  
千二百九十六匹故合為二千五百九十二匹家  
亦然鄭不從者天子十二閑分為左右一種馬有  
兩廐故有四百三十二匹諸侯無左右良馬三種  
三廐六百四十八匹駕馬一種三廐數亦如之并  
之為千二百九十六匹大夫亦是此法故云予以  
何術計之也

凡馬特居四之一

注欲其乘之性相似也

疏欲其乘之性相似者使三牝通牡為四共駕一

車也

春祭馬祖執駒

注馬祖天駟也孝經說曰房為龍馬執猶拘也二歲  
曰駒三歲曰駢春通淫之時駒弱血氣未定為其乘  
匹傷之

疏春時通淫求馬蕃息故祭馬祖

夏祭先牧頒馬攻特

注先牧始養馬者其人未開夏通淫之後攻其特謂駮之為其蹄齧不可乘用

疏夏祭先牧者夏草茂求肥充訓按頒馬者通淫之後即分牝牡使異處而養之且駮其特馬

秋祭馬社臧僕

臧子郎反

注馬社始乘馬者世本作曰相士作乘馬臧僕謂簡

練馭者令皆善也僕馭五路之僕

疏秋馬肥盛可乘故祭始乘馬者臧僕者秋時萬物成教之使善

冬祭馬步獻馬講馭夫

注馬步神為災害馬者獻馬見成馬於王也馭夫馭車從車使車者講猶簡習

疏步與哺字異音義同獻馬講馭夫亦謂物成可用也訓愚謂冬而祭馬步者亦猶索饗必於歲終

之意也

凡大祭祀朝覲會同毛馬而頒之

注毛馬齊其色也頒授當乘之

疏此三者皆須馬從王故毛馬而頒之按毛詩云  
宗廟齊絜尚純也戎事齊力尚強也田獵齊足尚  
疾也然田獵軍事亦俱尚色詩曰四驥彭彭又曰  
四鐵孔阜是也

飾幣馬執扑而從之

扑音撲  
舊下反

注校人主飾之幣馬以馬遺人當幣處者也聘禮曰  
馬則北面奠幣于其前士喪禮下篇曰薦馬纓三就  
入門北面交轡圉人夾牽之馭者執策立于馬後

疏云以馬當幣處者王家遺人無庭實故覲禮勞  
侯氏用璧無庭實則知此直以馬遺人無幣也引  
聘禮者證彼則有幣有馬引士喪禮證飾馬之事  
也訓按此承朝覲會同時有遺馬之法但遺之不  
知或於饗於燕及其匹數皆未聞焉抑匹如命數

與

凡賓客受其幣馬

注賓客之幣馬來朝聘而享王者

疏朝而享王者大行人云廟中將幣三享是也使  
客來聘享王者玉人職琢圭璋璧琮以頤聘是也  
大喪飾遣車之馬及葬埋之

注言埋之則是馬塗車之芻靈

田獵則帥驅逆之車

注帥猶將也

疏驅逆之車田僕設之校人主車馬帥領田僕而  
已

凡將事于四海山川則飾黃駒

注四海猶四方也王巡狩過大山川則有殺駒以祈  
沈禮與玉人職有宗祝以黃金勺前馬之禮

凡國之使者共其幣馬

注使者所用私覲



疏此謂王使下聘諸侯王行禮後乃更以此幣馬  
私與主君相見上文飾幣馬非聘故無私覲於賓  
客來朝聘不言私覲者諸侯之臣於天子不敢行  
私覲故也諸侯臣與君同行亦不得私覲聘則有  
之

凡軍事物馬而頒之

注物馬齊其力

等馭夫之祿

注馭夫於趣馬僕夫為中舉中見上下

宮中之稍食

注師圉府史以下也訓校人所掌王馬專待王用者  
三種齊道也兼給國用者三戎田駑也其給國用者  
蓋亦官府胥役為公用之及王出行則諸衛從王如  
虎士及國子之屬蓋皆給馬故諸子職云授之車甲  
是也鄉遂出軍車甲之制未有聞焉不在此科也

趣馬掌贊正良馬而齊其飲食簡其六節

注贊佐也佐正者謂校人臧僕講馭夫之時簡差也  
節猶量也差擇王馬以為六等

掌駕說之頒

說音稅

注用馬之第次

疏用馬當均勞逸故駕說須依次第

辨四時之居治以聽馭夫

治直吏反

注居謂牧廄所處治謂執駒攻特之屬

疏辨四時之居治者謂二月已前八月以後在廄

二月己後八月己前在牧云牧房者放牧之處皆

有房廩以蔭馬也

房音雅  
五下切

巫馬掌養疾馬而乘治之相醫而藥攻馬疾受財于校

人

相息  
亮反

注乘謂驅步以發其疾知所疾處乃治之相助也

疏巫知馬崇醫知馬疾二者相須受財謂祈崇之

具及藥直訓按序有醫四人即此是也

馬死則使其賈粥之入其布于校人

賈音嫁  
又音古

牧師掌牧地皆有厲禁而頒之

注頒馬授圉者所牧處

孟春焚牧

注焚牧地以除陳生新草也

疏孟春建寅之月

中春通淫

注月令季春乃合累牛騰馬遊牝于牧秦時書也秦

地寒涼萬物後動

掌其政令凡田事贊焚萊

注焚萊者山澤之虞

庾人掌十有二閑之政教以阜馬佚特教駢攻駒及祭

馬祖祭閑之先收及執駒散馬耳圉馬

庾所求反佚音逸散素但反

注九者皆有政教焉阜盛壯也佚當為逸逸者用之不使甚勞安其血氣也教駢始乘習之也攻駒駢其蹄齧者閑之先收先收制閑者散馬耳謂聒馬耳以竹括押其耳頭動搖則括中物後遂串習不復驚

疏云先牧制閑者以上云夏祭先牧直是先養馬者非制閑之人也訓愚謂圉馬當連下文正校人員選為句蓋度人掌當祭馬祖之時則祭閑之先牧焉當執駒之時則就取而散其耳焉自幼而習之也若夫圉馬之事則為校人正其員選焉別其能否以告校人也

正校人員選

注校人謂師圉也正員選者選擇可備員者平之

疏知校人是師圉者凡言正者以尊正卑趣馬以  
上並上官非度人所正也

馬八尺以上為龍七尺以上為駉六尺以上為馬

注大小異名月令曰駕蒼龍爾雅曰駉牝驪牡玄

疏爾雅之意以衛詩駉牝中兼有牡引之者證駉  
是馬色

圉師掌教圉人養馬春除蓐疊廄始收夏房馬冬獻馬

射則充椹質茨牆則翦闔

蓐音辱茨在私反闔  
戶臘反房五嫁反



注蓐馬茲也馬既出而除之新釁焉神之也春秋傳  
曰凡馬日中而出日中而入序廡也所以庇馬涼也  
充猶居也茨蓋也闔苦也堪質翦闔圉人所習也

圉人掌養馬芻牧之事以後圉師凡賓客喪紀牽馬而  
入陳

注賓客之馬王所以賜之者詩云雖無予之路車乘  
馬喪紀之馬啓後所薦馬

疏賓客之馬則王使人就館陳之喪紀之馬則謂

將葬朝廟時既夕禮薦馬纓三就是也天子亦當  
在祖廟中陳設明器時遣人薦馬及纓入廟陳之  
此馬謂擬駕乘車吉器最先者也

廕馬亦如之

注廕馬遣車之馬人捧之亦牽而入陳

職方氏掌天下之圖以掌天下之地辨其邦國都鄙四  
夷八蠻七閩九貉五戎六狄之人民與其財用九穀六  
畜之數要周知其利害

閩已巾反又音文又已千反漢書音義服皮音近蠻應劭音近

文鄭氏音反  
貉孟白反

注東方曰夷南方曰蠻西方曰戎北方曰貉狄閩蠻  
之別也國語曰閩蠻蠻矣四八七九五六周之所服  
國數也財用泉穀貨賄也利金錫竹箭之屬害神姦  
鑄鼎所象百物也

疏大司徒亦掌地閩者彼直掌九州不兼夷狄此  
職兼主夷狄也訓案利害當兼地勢與百物言物  
之利害則注具之地之利害則形勢險易是也人

民財用之等即下九州所列職方制貢故須知其數要職方制貢所以異於司徒者司徒均齊天下之政謂各處九州之民歲入于其國之數也職方所言則九州之國所入于王之數也

乃辨九州之國使同貫利

注貫事也訓按事利者各以所事為利也如揚州之土則以取金錫竹箭養鳥獸種稻為事而利出焉既辨之又同之者辨各土之所有而後可以通其所無

也

東南曰揚州其山鎮曰會稽其澤藪曰具區其川三江其沒五湖其利金錫竹箭其民二男五女其畜宜鳥獸

其穀宜稻

會古外反藪索口反區起俱反沒子鳩反木又作沒

注鎮名山安地德者也會稽在山陰大澤曰藪具區五湖在吳南沒可以為陂灌溉者錫鑛也箭篠也鳥獸孔雀鸞鳩鴈犀象之屬

疏此以下陳九州總為三道陳之從南方起取尊

陽方周改禹貢以徐梁二州合於雍青分冀州地  
以爲幽并東南曰揚州次正南曰荊州周之西南  
不置州統屬雍州即次河南曰豫州爲一道次正  
東曰青州次河東曰兗州次正西曰雍州爲二道  
次東北曰幽州次河內曰冀州次正北曰并州爲  
三道訓顧祖禹曰具區即震澤今太湖也三江一  
曰松江二曰婁江三曰東江皆自太湖分流東入  
海五湖太湖東岸五灣也

正南曰荊州其山鎮曰衡山其澤藪曰雲胥其川江漢其浸潁湛其利丹銀齒革其民一男二女其畜宜鳥獸

其穀宜稻

晉亡貢反劉亡鳳反李一音亡雄反湛直減反劉又音沈李唐感反

注衡山在湘南雲胥在華容潁出陽城宜屬豫州在此非也湛未聞齒象齒也革犀兕革也湛或作淮

疏此直言江不言三江者此州江未分為三也訓顧祖禹曰潁水發源河南登封縣東陽乾山至南直鳳陽府潁州潁上縣入淮湛在今河南汝州境

內有湛水按二水本禹貢豫州之域

河南曰豫州其山鎮曰華山其澤藪曰圃田其川滎雒其浸波澨其利林漆絲枲其民二男三女其畜宜六擾

其穀宜五種

滎戶何反澨音詐左傳音同李莊加反枲思似反擾而小反

注華山在華陰圃田在中年滎兗水也出東垣入于

河洑為滎滎在滎陽波讀為播禹貢曰滎播既都春

秋傳曰楚子除道梁澨則澨宜屬荊州在此非也林

竹木也六擾馬牛羊豕犬雞五種黍稷菽麥稻



疏必知五種是黍稷穀麥稻者此州東接青州青州有稻麥西接雍州雍州有黍稷也訓愚按此洛乃禹貢自熊耳山出流入河者與下渭洛不同也

正東曰青州其山鎮曰沂山其澤藪曰望諸其川淮泗其浸沂沭其利蒲魚其民二男二女其畜宜雞狗其穀

宜稻麥

沂魚祈反泗音四沭音述李一音餘戌反

注沂山沂水所出也在蓋望諸明都也在睢陽沭出東莞二男二女數等似誤當與兗州同二男三女淮

或為睢沭或為洙

疏按禹貢海岱及淮惟徐州淮沂其又不在青州者周公并徐州為青故也云明都者按禹貢道潞澤被孟豬春秋又有孟諸即此也知二男二女是誤也者若本有此數等當言一男一女矣

河東曰兗州其山鎮曰岱山其澤藪曰大野其川河涕其浸廬維其利蒲魚其民二男三女其畜宜六擾其穀宜

四種

汴子禮反廬音雷維於恭反

注岱山在博大野在鉅野廬維當為雷雍字之誤也  
禹貢曰雷夏既澤雍沮會同雷夏在城陽四種黍稷  
稻麥訓按涕即濟也

正西曰雍州其山鎮曰嶽山其澤數曰弦蒲其川涇汭  
其浸渭洛其利玉石其民三男二女其畜宜牛馬其穀

宜黍稷

汭如  
銳反

注嶽吳嶽也及弦蒲在汧涇出涇陽汭在隴地詩大  
雅公劉曰汭沔之即洛出懷德弦或為汧蒲或為浦

疏此洛即詩瞻彼洛矣一也與熊耳出者別也

泥弓

六反詩作  
鞠與坻同

東北曰幽州其山鎮曰醫無閭其澤數曰獫狁其川河

涕其浸菑時其利魚鹽其民一男三女其畜宜四擾其

穀宜三種

獫音  
兮

注醫無閭在遼東獫狁在長廣菑出萊蕪時出般陽

四擾馬牛羊豕三種黍稷稻

疏地理志長廣屬徐州瑯琊有萊山周時幽州南

侵徐州之地也知三種黍稷稻者西接冀州冀宜  
黍稷

河內曰冀州其山鎮曰霍山其澤藪曰楊紆其川漳其  
沒汾潞其利松柏其民五男三女其畜宜牛羊其穀宜  
黍稷

紆於手反汾北  
文反潞音路

注霍山在毗楊紆所在未聞漳出長子汾出汾陽潞  
出歸德訓顧祖禹曰爾雅秦有楊紆未詳

正北曰并州其山鎮曰恒山其澤藪曰昭餘祁其川虒

池嘔夷其浸淶易其利布帛其民二男三女其畜宜五

擾其穀宜五種

庠喚胡反李胡哥反池徒多反李如字嘔馬侯反一音驅

注恒山在上曲陽昭餘祁在鄔庠池出鹵城嘔夷祁

夷與出平舒淶出廣昌易出故安五擾馬牛羊犬豕

五種黍稷穀麥稻也此州界揚荊豫兗雍冀與禹貢

畧同青州則徐州地也幽并則青冀之北也無徐梁

疏云揚荊豫兗雍冀與禹貢畧同者雖仍舊猶有

相侵故云畧同也若州之兗州於禹貢侵青徐地

青州侵豫州地雍豫兼梁州地冀州小於禹貢時  
以其北有幽并也自古以來皆有九州惟舜暫置  
十二州至夏還為九州

乃辨九服之邦國方千里曰王畿其外方五百里曰侯  
服又其外方五百里曰甸服又其外方五百里曰男服  
又其外方五百里曰采服又其外方五百里曰衛服又  
其外方五百里曰蠻服又其外方五百里曰夷服又其  
外方五百里曰鎮服又其外方五百里曰藩服

注服服事天子也詩曰侯服于周

疏侯之言侯也為王斥侯也甸之言田為王治田  
男之言任為王任職采者事也為王事民以供上  
衛者為王衛禦蠻之言縻以政教縻之自此以外  
皆夷狄故夷之鎮者鎮守藩者藩籬其夷狄三服  
大行人總亦謂之藩也

凡邦國千里封公以方五百里則四公方四百里則六  
侯方三百里則七伯方二百里則二十五子方百里則



百男以周知天下

注以此率徧知四海九州邦國多少之數也方千里者為方百里者百以方三百里之積以九約之得十一有奇云七伯者字之誤也周九州之界方七千里七七四十九方千里者四十九其一為畿內餘四十八八州各有方千里者六周公變殷湯之制雖小國地皆方百里是每事言則者設法也設法者以待有功而大其封一州之中以其千里封公則可四封侯則

可六封伯則可十一封子則可二十五封男則可百  
公侯伯子男亦不是過也州二百一十國以男備其  
數焉其餘以為附庸四海之封黜陟之功亦如之雖  
有大國爵稱子而已

疏王制云公侯方百里伯七十里子男五十里此  
是夏制五等爵三等受地殷湯承之合伯子男為  
一惟有公侯伯三等爵三等受地武王伐紂增以  
子男爵地與夏同周公制禮始為此五等爵五等

受地云周公變殷湯之制雖小國地皆方百里者  
以其不方百里不成國也既皆滿百里其餘待有  
功乃有益地公有功益滿五百里侯伯已下皆然  
男有功止得百里更有功乃更進之與子爵必知  
不即封而設法以待有功者以其稱公者唯有二  
王後及東西大伯今八州若皆封公八州豈有三  
十二公乎明知是設法以待有功若無功縱本是  
公爵唯守百里地故注王制云是以周制有爵尊

而國小爵卑而國大云公侯伯子男不是過者五  
百里以下若過五百里則是特賜法若魯衛也云  
州二百一十國以男備其數者州有千里之方六  
用五个千里封之得四公六侯十一伯二十五子  
百男僅得一百四十六於二百一十國仍少六十  
四并餘千里之方一充數不足何得更為附庸若  
然於前侯國六內用千里方仍有二百里方一得  
四个男國於十一伯內又得一个男國得此添前

一百四十六為一百五十一仍少五十九更取餘  
一千里方內取五十九國添之餘百里之方四十  
一以為附庸有人受之為附庸無則為閒田使大  
夫治之若四等公邑是也云四海之封亦如之者  
此經唯言九州故鄭兼見四海夷鎮藩亦如之者  
有功亦有加地得至四百里但不進爵耳曲禮云  
其在夷狄戎蠻雖大曰子是也

凡邦國小大相維

注大國比小國小國事大國各有屬相維聯也

疏王制云五國以為屬屬有長之類是各有屬相維聯之事也

王設其牧

注選諸侯之賢者為牧使牧理之

制其職各以其所能

注牧監參伍之屬用能所任秩次訓按侯國之卿大夫士命數王亦制之

制其貢各以其所有王將巡守則戒于四方曰各脩平  
乃守攷乃職事無敢不敬戒國有大刑

注守謂國竟之內職事所當共具訓按守如孟子所  
謂入其疆土地闢之類

及王之所行先道帥其屬而巡戒令

注先道先由王所從道君前行其前日所戒之令

王殷國亦如之

注殷猶衆也十二歲王若不巡守則六服盡朝謂之

殷國其戒四方諸侯與巡守同

疏王有故不巡守方岳之下則春東方盡來夏南方盡來秋西方盡來冬北方盡來王待之亦各於其時在國外為壇行朝覲盟載之法若然亦戒令四方諸侯者殷國所在無常或在國外或向畿外侯國行故有戒令之事訓謹詳周設職方之官蓋所以遙制邦國諸侯故其篇末以邦國終焉首言九州山川者蓋名山大澤不以封此是王者所有



故別言之九服以次而出經也公侯伯子男大小殊制是其緯也使之大小相維則諸侯之親諸侯也為之設其牧制其職施其貢而巡守則天子之親諸侯也此周官治外之法也

土方氏掌土圭之法以致日景

注致日景者夏至景尺有五寸冬至景丈三尺其間則日有長短

以土地相宅而建邦國都鄙

相息亮反

注土地猶度地知東西南北之深而相其可居者宅居也訓以土圭相宅建國者蓋以辨南北向背之方以辨土宜土化之法而授任地者

注土宜謂九穀稊稗所宜也土化地之輕重糞種所宜用也任地者載師之屬

王巡守則樹王舍

注為之藩羅

疏掌舍設柙柙此官亦於外周匝樹藩羅

懷方氏掌來遠方之民致方貢致遠物而送逆之達之以節

注遠方之民四夷之民也諭德延譽以來之遠物九州之外無貢法而至者達民以旌節達貢物以墮節治其委積館舍飲食

注續食其往來

合方氏掌達天下之道路

注津梁相湊不得陷絕

通其財利

注懋遷其有無

同其數器

注權衡不得有輕重

壹其度量

注尺丈釜鍾不得有大小

除其怨惡

注怨惡邦國相侵虐訓除蓋解釋之

同其好善

注所好所善謂風俗所高尚訓同蓋教道之使以善為尚也

訓方氏掌道四方之政事與其上下之志

注道猶言也為王說之四方諸侯也上下君臣也

誦四方之傳道

注傳道世世所傳說往古之事也

正歲則布而訓四方

注布告以教天下使知世所善惡訓布而訓之者美者以為法惡者以為戒使衆國皆相通知而觀新物

注四時於新物出則觀之以觀民志所好惡志淫行辟則當以政教化之

疏此觀新物即王制云命市納價

形方氏掌制邦國之地域而正其封疆無有華離之地

菲依注音  
孤苦哇反

注華讀為孤哨之孤正之使不孤邪離絕

疏孤哨者投壺禮有枉矢哨壺是不正之義孤者  
兩頭寬中狹邪者一頭寬一頭狹正其封疆不使  
相侵

使小國事大國大國比小國

注比猶親也

山師掌山林之名辨其物與其利害而頒之于邦國使  
致其珍異之物

注山林之名與物若岱畎絲泉嶧陽孤桐矣利其中  
人用者害毒物及螫噬之蟲獸

川師掌川澤之名辨其物與其利害而頒之于邦國使  
致其珍異之物

注川澤之名與物若泗濱浮磬淮夷蠙珠暨魚澤之  
萑蒲

遼師掌四方之地名辨其丘陵墳衍遼隰之名

遼音原

注地名若東原大陸之屬



物之可以封邑者

注物之謂相其土地可以居民立邑

疏四井為邑據田中千室之邑據城二者皆須物之

匡人掌達法則匡邦國而觀其慝使無敢反側以聽王命

注法則八法八則也邦國之官府都鄙亦用焉反側背違法度也

譚人掌誦王志道國之政事以巡天下之邦國而語之

使萬民和悅而正王面

說音悅

注面猶鄉也使民之心曉而正鄉王

都司馬掌都之士庶子及其衆庶車馬兵甲之戒令

注庶子卿大夫士之子車馬兵甲備軍發卒

疏都王子弟及三公采地司馬主其軍賦若王家

有軍事徵兵于采地則都司馬以書致于士庶子

有此衆庶車馬兵甲之戒令士庶子受而依行之

以國法掌其政學

注政謂賦稅也學脩德學道

疏正謂軍之賦稅無田稅泉稅

以聽國司馬

注聽者受行其所徵為也國司馬大司馬之屬皆是


疏大司馬之屬謂軍司馬與司馬行司馬

家司馬亦如之

注大冢家臣為司馬者春秋傳曰叔孫氏之司馬駿

戾

疏序官注卿大夫之采地王不特置司馬各自使  
其家臣為司馬往聽政于王之司馬



周禮纂訓卷十八

欽定四庫全書

經部

周禮纂訓卷二十九至三十一

詳校官監察御史臣施朝幹

刑部郎中臣許兆椿覆勘

總校官編修臣王燕緒

校對官待詔臣胡士震

謄錄監生臣李信祖

欽定四庫全書

周禮纂訓卷十九

安溪李鍾倫撰

秋官司寇第五

惟王建國辨方正位體國經野設官分職以為民極乃立秋官司寇使帥其屬而掌邦禁以佐王刑邦國

刑官之屬大司寇卿一人小司寇中大夫二人士師下大夫四人鄉士上士八人中士十有六人旅下士三十

有二人府六人史十有二人胥十有二人徒百有二十人

遂士中士十有二人府六人史有十二人胥十有二人徒百有二十人

縣士中士三十有二人府八人史十有六人胥十有六人徒百有六十人

方士中士十有六人府八人史十有六人胥十有六人徒百有六十人



訝士中士八人府四人史八人胥八人徒八十人

訝五嫁反

朝士中士六人府三人史六人胥六人徒六十人

司民中士六人府三人史六人胥三人徒三十人

司刑中士二人府一人史二人胥二人徒二十人

司刺下士二人府一人史二人徒四人

刺七賜反

司約下士二人府一人史二人徒四人

司盟下士二人府一人史二人徒四人

職金上士二人下士四人府二人史四人胥八人徒八

十人

司厲下士二人史一人徒十有二人

夫人下士二人府一人史二人賈四人徒十六人

司圜中士六人下士十有二人府三人史六人胥十有六人徒百有六十人

掌囚下士十有二人府六人史十有二人徒百有二十人

掌戮下士二人史一人徒十有二人

司隸中士二人下士十有二人府五人史十人胥二十人徒二百人

罪隸百有二十人

蠻隸百有二十人

閩隸百有二十人

夷隸百有二十人

貉隸百有二十人

貉音陌

布憲中士二人下士四人府二人史四人胥四人徒四

十人

禁殺戮下士二人史一人徒十有二人

禁暴氏下士六人史三人胥六人徒六十人

野廬氏下士六人胥十有二人徒百有二十人

蜡氏下士四人徒四十人

蜡音靺  
七廬切

雍氏下士二人徒八人

萍氏下士二人徒八人

萍音平廣韻  
音瓶薄經切

司寤氏下士二人徒八人

司烜氏下士六人徒十有二人

烜音燠許委切又况晚切

條狼氏下士六人胥六人徒六十人

條音滌徒歷反

修閭氏下士二人史一人徒十有二人

冥氏下士二人徒八人

冥如字又莫歷反

庶氏下士一人徒四人

庶音煮又章預反

穴氏下士一人徒四人

翼氏下士二人徒八人

翼音翅失政反

柞氏下士八人徒二十人

柞音昨在各切又音作

雞氏下士二人徒二十人

雞或作雉同音替  
他計切又音雉

哲蔺氏下士一人徒二人

哲音摘他歷  
反蔺蒼獨反

翦氏下士一人徒二人

赤友氏下士一人徒二人

友音拔

蠲氏下士一人徒二人

蠲音國廣韻  
音馘古獲切

壺涿氏下士一人徒二人

庭氏下士一人徒二人

銜枚氏下士二人徒八人

伊耆氏下士一人徒二人

大行人中大夫二人小行人下大夫四人司儀上士八人  
中士十有六人行夫下士三十有二人府四人史八人  
胥八人徒八十人

環人中士四人史四人胥四人徒四十人

象胥每翟上士一人中士二人下士八人徒二十人

掌客上士二人下士四人府一人史二人胥二人徒二十人

掌訝中士八人府二人史四人胥四人徒四十人

掌交中士八人府二人史四人徒三十有二人

掌察四方中士八人史四人徒十有六人

掌貨賄下士十有六人史四人徒三十有二人

朝大夫每國上士二人下士四人府一人史二人庶子  
八人徒一十人

都則中士一人下士二人府一人史二人庶子四人徒  
八十人



都士中士二人下士四人府二人史四人胥四人徒四十人家士亦如之

大司寇之職掌建邦之三典以佐王刑邦國詰四方

詰起

吉反

注典法也詰謹也

一曰刑新國用輕典

注新國者新辟地立君之國用輕典者為其民未習於教

疏趙商問族師法八閭為聯使之相保相受刑罰  
慶賞相及在康誥曰父子兄弟罪不相及不知書  
禮異同如何答曰族師法乃周公制禮使民相拱  
勅康誥時新誅三監天下未定務在尚寬故也若  
然天下未定卽是新國用輕典之義也

二曰刑平國用中典

注平國承平守成之國也用中典者常行之法

三曰刑亂國用重典

注亂國篡逆之國以其化惡伐滅之

以五刑糾萬民

注刑亦法也

疏此五刑與墨劓之等別或一刑之中而含五或此五刑全不入五刑者

一曰野刑上功糾力

注功農功力勤力

二曰軍刑上命糾守

注命將命也守不失部伍

三曰鄉刑上德糾孝

注德六德也善父母為孝

四曰官刑上能糾職

注能能其事也職職事修理

五曰國刑上愿糾恭

愿音願糾又音  
恭恭註作恭

注愿慙慎也恭當為恭字之誤訓凡此五者蓋皆麗於五刑者也故諸官之中多有云附于刑者歸于士

是也明未附于刑者當官薄罰之也鄉刑即大司徒所未鄉之八刑官刑與太宰八法中官刑有異國刑即司市所謂以刑罰禁暴而去盜故曰糾暴也不曰市刑而曰國刑何也惟市在國中若其餘居民在國中者當從鄉刑之條刑不上大夫其言官刑何也蓋此所謂官刑乃施之於在官者府史胥徒之屬故上云糾萬民明非官長也野刑軍刑鄉刑外事也官刑國刑內事也

以園土聚教罷民

罷音皮

注園土獄城也聚罷民其中困苦以教之為善也民不愆作勞有似於罷

凡害人者寘之園土而施職事焉以明刑恥之

寘之鼓反又音

示

注害人謂為邪惡已有過失麗於法者以其不故犯法寘之園土繫教之施職事以所能役使之明刑書其罪惡於大方版著其背

疏按司救云凡民之有衰惡者三罰而士加明刑  
恥諸嘉石後諸司空即此下文者是也此謂過輕  
直坐嘉石不入園土也彼又云其有過失者三罰  
而歸于園土此謂罪重不坐嘉石徑入園土其晝  
日亦後諸司空夜乃入園土也

其能改者反于中國不齒三年其不能改而出園土者  
殺

注反於中國謂舍之還於故鄉里也司園職曰上罪

三年而舍中罪二年而舍下罪一年而舍不齒者不得以年次列于平民出謂逃亡

以兩造禁民訟入東矢於朝然後聽之

造七  
報反

注訟謂以財貨相告者造至也使訟者兩至既兩至使入東矢乃治之也不至不入東矢則是自服不直者也必入矢者取其直也古者一弓百矢東矢其百个與

疏此與下所言禁者謂令先入此物不實則沒入



官若不入則是自服不直禁民省事之法也

以兩劑禁民獄入鈞金三日乃致于朝然後聽之

劑子  
隨反

注獄謂相告以罪名者劑今券書也使獄者各齎券  
書既兩券書使入鈞金又三日乃治之重刑也不券  
書不入金則是自服不直者也必入金者取其堅也  
三十斤曰鈞

疏劑券書者謂獄訟之要辭

以嘉石平罷民

注嘉石文石也樹之外朝門左平成也成之使善

凡萬民之有罪過而未麗於法而害於州里者桎梏而坐諸嘉石役諸司空重罪旬有三日坐期後其次九日坐九月後其次七日坐七月後其次五日坐五月後其下罪三日坐三月後使州里任之則宥而舍之

桎音質  
梏古母

反

注木在足曰桎在手曰梏

疏未麗於法對入圜土為法

以肺石達窮民

肺勞  
廢反

注肺石赤石也

凡遠近惇獨老幼之欲有復於上而其長弗達者立於

肺石三日士聽其辭以告於上而罪其長

惇其營反長  
丁丈反上時

掌  
反

注無兄弟曰惇無子孫曰獨復猶報也上謂王與六

卿也長謂諸侯若鄉遂大夫

正月之吉始和布刑于邦國都鄙乃縣刑象之法于象

魏使萬民觀刑象挾日而斂之

縣音  
左

注布刑布五刑於天下

凡邦之大盟約蒞其盟書而登之于天府大史內史司會及六官皆受其貳而藏之

疏大盟約謂王與諸侯因大會同而與盟訓大史內史司會之職皆掌典籍者故受其貳

凡諸侯之獄訟以邦典定之

注邦典六典也以六典待邦國之治

凡卿大夫之獄訟以邦法斷之

斷丁  
亂反

注邦法八法也以八法待官府之治

凡庶民之獄訟以邦成弊之

弊必  
世反

注邦成八成也以官成待萬民之治弊之斷其獄訟也訓一曰邦典司寇之三典也邦法所謂以八辟麗邦法附刑罰邦成士師之八成亦通

大祭祀奉犬牲

疏犬屬西方金故司寇奉進之

若禋祀五帝則戒之日涖誓百官戒于百族

注戒之日卜之日也百族謂府史以下也郊特牲曰  
獻命庫門之內戒百官也大廟之命戒百姓也

疏百官則大司寇臨他官誓之百族則大司寇親  
自戒之若然大宰掌百官之誓戒戒則親為之誓  
亦是使餘小官誓之以司寇不得涖大宰也引郊  
特牲者欲見此百族是府史以下彼百姓是王之  
親故入廟門乃戒之知百族非百姓者以其王之

百姓亦同大宰戒之

及納亨前王祭之日亦如之

亨普庚反

注納亨致牲

疏納亨致牲者謂將祭之辰

奉其明水火

注明水火所取於日月者

疏水以配鬱鬯與五齊火以給饗亨也

凡朝覲會同前王大喪亦如之

注大喪所前或嗣王

疏言或者大喪中兼王喪及后世子若是后世子

則王為正王也

大軍旅涖戮于社

注社謂社主在軍者也

凡邦之大事使其屬蹕

蹕本亦作  
趨音畢

注屬士師以下也訓司寇佐王刑邦國首言輕重三

典所以權衡用法之本次言內外五刑所以通舉用



刑之要此皆麗於刑罰者也欲其不致於刑也則有  
園土以收教之又不欲輕用其刑也則有兩造兩劑  
以禁止之乃罪復未至於園土者又有嘉石以佐其  
闕匡直輔翼之道有不至焉者乎且力有不能具鈞  
金束矢者又有肺石以達其窮憫老幼之情有不通  
焉者乎聖人之言畧舉綱維而斟酌變通之道哀矜  
惻怛之思靡不具見焉矣正月以上乃條列治法正  
月以下乃施行治法又或有與他官共事者亦俱在

正月之下惟當官獨任者乃俱列於上此經之凡例也

小司寇之職掌外朝之政以致萬民而詢焉一曰詢國危二曰詢國遷三曰詢立君

注外朝在雉門之外國危謂有兵寇之難國遷謂徙都改邑立君謂無冢適遷于庶也

疏云立君謂無冢適者冢適雙言后所生故改者為冢次冢為適無冢立適又無適乃立庶也訓案下

文兼有羣吏此獨云萬民者羣吏在朝是常萬民則惟大事及訛疑獄乃致之故特言也

其位王南鄉三公及州長百姓北面羣臣西面羣吏東

面

鄉許  
亮反

注羣臣卿大夫士也羣吏府史也其孤不見者孤從羣臣卿大夫在公後

疏此孤位與射人及司士異射人司士職文孤位皆西方東而北上今此則在東方也訓案此所謂

三公即二鄉而公一人者也言州長不言鄉大夫者蓋鄉大夫乃卿為之尊不可同州長等居三公後當與羣臣為列共居西而故朝士職孤卿大夫位在左其中或有鄉大夫在與三公在周官無位注疏謂二鄉一人者乃致仕之三公愚謂不然既已致仕豈得復掌六卿蓋三公在王朝掌六鄉其采邑當別使吏治之耳

小司寇擯以叙進而問焉以衆輔志而弊謀

擯兵反

注擯謂揖之使前也

疏以敘進謂先公卿以次而下訓按志王之志也

書曰謀及乃心

以五刑聽萬民之獄訟附于刑用情訊之至于旬乃弊

之讀書則用法

訊音信

注附猶著也訊言也用情理言之冀有可以出之者

十日乃斷之鄭司農云讀書則用法如今時讀鞫已

乃論之

疏鞫謂劾囚之要辭行刑之時讀已乃論其罪也  
訓按用情訊之謂罪雖已附於刑而容有隱情未  
盡謂迫於不得已陷于不知與為親受汙之類王  
制所謂原父子之親立君臣之義以權之意論輕  
重慎測淺深是也此乃法外之意推求至于旬日  
而無可原然後斷罪讀書用法明不以意為輕重  
王制所謂郵罰麗于事也一以見原情而不專於  
法一以見執法而無所於私

凡命夫命婦不躬坐獄訟

注不躬坐必使其屬若子弟也喪服傳曰命夫者其男子之為大夫者命婦者其婦人之為大夫妻者

疏坐者古者取囚要辭皆對坐訓按訊獄之時又有不躬坐者用法之時又有不即市者所以優異尊親

凡王之同族有罪不即市

注鄭司農云刑諸甸師氏

以五聲聽獄訟求民情

疏按呂刑惟貌有稽在獄定之後則此五聽亦在要辭定訖恐其濫失更以五聽觀之訓按五聽以聲為主何也聽者聽其辭其餘色氣皆因詞而察之故主於聲也疏謂獄定之後乃有五聽恐未必然經云求民情又其中有辭聽之文若未聽其詞民情未得獄何由定乎愚謂上文五刑一節是綱此五聽即所謂聽之而附于刑之法也



一曰辭聽

注觀其出言不直則煩

二曰色聽

注觀其顏色不直則赧然

三曰氣聽

注觀其氣息不直則喘

四曰耳聽

注觀其聽聆不直則惑

五曰目聽

注觀其眸子不直則眊然訓聽言之道先斷其理次觀其色次候其氣次察其神詞者理之發也耳目者神之官也先審其辭而理已得十四五矣參之色氣與神人焉度哉色動而易見氣又次之神又次之也以八辟麗邦法附刑罰

注辟法也麗附也猶著也

疏按曲禮云刑不上大夫鄭注云其犯法則在八

議輕重不在刑書若然此八辟不在刑書若有罪  
當議議得其罪乃附邦法而附于刑罰也訓按麗  
與附互相解邦法刑書也八者人有犯罪則以刑  
書相依倣論罪而後附于刑罰八辟之刑罰或各  
降於刑書與

一曰議親之辟

注鄭司農云若今時宗室有罪先請是也

二曰議故之辟

注故謂舊知也

三曰議賢之辟

注賢謂有德行者

四曰議能之辟

注能謂有道藝者

五曰議功之辟

注謂有大勲力立功者

六曰議貴之辟

注鄭司農云若今時吏墨綬有罪先請是也

七曰議勤之辟

注謂憔悴以事國

八曰議賓之辟

注謂所不臣者三恪二代之後與訓愚謂賓謂賓旅  
以其為賓未嫺法禁輕之八者之序與冢宰八統之  
序正同親親賢賢庸勲敬貴此周家之治勤者功之  
屬也賓者貴之屬也

以三刺斷庶民獄訟之中

注中謂罪正所定

一曰訊羣臣二曰訊羣吏三曰訊萬民

注刺殺也三訊罪定則殺之訊言也

聽民之所刺宥以施上服下服之刑

注宥寬也民言殺殺之言寬寬之上服劓墨也下服

宮則也

疏凡行刺必先以物規之如衣服乃施行故言服

也

及大比登民數自生齒以上登于天府

比毗志反

注大比三年大數民之衆寡也人生齒而體備男八月而生齒女七月而生齒

內史司會冢宰貳之以制國用

注人數定而九賦可知國用乃可制耳訓按生齒繁則授田多而國用益

小祭祀奉犬牲凡禋祀五帝實鑊水納亨亦如之

鑊戶郭反

注納亨致牲也其時鑊水當以洗解牲體肉

疏鄭知實鑊水為洗解牲肉者以下云納亨亦如之是實鑊水亨煮肉故知此是洗肉也

大賓客前王而辟

辟婢亦反劉符益反  
一音匹亦反沈音避

疏下士師云諸侯為賓帥其屬蹕于王宮饗燕時此小司寇為王辟亦謂於宮中饗燕在寢及廟時也

后世子之喪亦如之



疏謂后世子之喪當朝廟時王出入亦辟也

小師涖戮

注小師王不自出之師

凡大國之事使其屬蹕

注屬士師以下

孟冬祀司民獻民數於王王拜受之以圖國用而進退之

注司民星名軒轅角也進退猶損益也國用民衆則

益民寡則損

疏前文大比登民數據三年而言此則據年年民數皆有增減

歲終則令羣士計獄弊訟登中于天府

注上其所斷獄訟之數

正歲帥其屬而觀刑象令以木鐸曰不用法者國有常刑令羣士乃宣布于四方憲刑禁

注憲表也謂縣之也刑禁士師之五禁

乃命其屬入會乃致事

注得其屬之計乃令致之於王訓按詢國大事之典  
在小司寇者以其掌外朝之政詢衆庶在外朝故也  
詢國大事是重典故在職首下文以五刑聽萬民之  
獄訟一節是綱以五聲求民情即聽其獄訟而附于  
刑也以八辟麗邦法即由命夫命婦與王之同族而類推  
之也聽民之刺宥以施刑罰則又是未定之疑獄而  
於五聽之外復有此傳謀之事也

士師之職掌國之五禁之法以左右刑罰一曰宮禁二曰官禁三曰國禁四曰野禁五曰軍禁皆以木鐸徇之

于朝書而縣于門閭

徇以俊反  
縣音玄

注左右助也助刑罰者助其禁民為非也宮王宮也  
官官府也國城中也古之禁書亡矣今宮門有符籍  
官府有無故擅入城門有離戟下帷野有田律軍有  
踞謹夜行之禁其痛可言者訓按此即大司寇五刑  
之禁五刑自外而內五禁自內而外五刑無宮中之

刑以王宮在內司寇不得施刑五禁無鄉禁者蓋國禁中可包鄉禁也

以五戒先後刑罰毋使罪麗于民一曰誓用之于軍旅二曰誥用之于會同三曰禁用諸田役四曰糾用諸國中五曰憲用諸都鄙

注先後猶左右也誓誥所見於書是也禁則軍禮曰無干車無自後射此其類也糾憲未有聞焉訓按禁者條列其事戒者則有文教之施五者蓋以事之大

小為先後國中曰糾蓋即大司寇五刑糾萬民之事  
故五刑中無及都鄙以外事者是其國中之事也憲  
即布憲所掌但布憲中兼有邦國此云都鄙者都鄙  
亦國屬也國中近故可用糾察都鄙以外縣其告令  
而已

掌鄉合州黨族閭比之聯與其民人之什伍使之相安  
相受以比追胥之事以施刑罰慶賞

注鄉合鄉所合也

疏州黨族閭比之聯即是鄉合之事五人為伍二  
伍為什據追胥之時相受謂相受寄托以施刑罰  
慶賞者使鄰伍相及也訓愚按追胥字義蓋追盜  
之胥役也州黨族閭比之聯是家與家相合也民  
人之什伍是人與人相合也無事則家相合而使  
之相安相受焉族師聯法是也有事則人相合而  
比追胥之事焉小司徒伍兩之法是也刑罰慶賞  
則通承二義也

掌官中之政令

注大司寇之官府中也

察獄訟之辭以詔司寇斷獄弊訟致邦令

注致邦令者以法報之

掌士之八成

注八成者行事有八篇

一曰邦汭

汭上灼反廣韻音灼市若切

注汭讀如酌酒尊中之酌謂斟酌盜取國家密事若



今時刺探尚書事訓或曰洵說文云激水聲也邦洵  
謂因兵後凶荒激民為亂

二曰邦賊

注為逆亂者

三曰邦誅

誅音牒

注為異國反間

四曰犯邦令

注干冒王教令

五曰擣邦令

擣音矯

注稱詐以有為者

六曰為邦盜

注竊取國之寶藏

七曰為邦朋

注朋黨相阿使政不平

八曰為邦誣

注誣罔使事失實訓按此謂之成者成而不變犯者

無赦即王制四誅不以聽之條是也邦汙邦賊邦謀  
背叛不軌罪最重犯邦令橋邦令是公行為惡者故  
次之橋邦令如亂名改作橋如言矯枉變更之謂為  
邦盜邦朋邦誣是狡獪為惡者又次之皆不待聽而  
誅者也邦誣者即王制所謂假於鬼神卜筮以疑衆  
是也

若邦凶荒則以荒辯之法治之

注辯當為貶饑荒則刑罰國事有所貶損朝士職曰

若邦凶荒札喪寇戎之故則令邦國都家縣鄙慮刑  
貶訓按荒貶之法者當移民通財糾守緩刑時所施  
之刑罰也恐民因弛寬而致亂故亦設法以弭之但  
小貶而已

令移民通財糾守緩刑

注移民就賤救困也通財補不足也糾守備盜賊也  
緩刑舒民心也

凡以財獄訟者正之以傅別約劑

傅音附約於  
妙反又如字

注傳別中別手書也約劑各所持券也

若祭勝國之社稷則為之尸

注以刑官為尸畧之也

王燕出入則前驅而辟

注燕出入謂宮苑皆是

祀五帝則沃尸及王盥洎鑊水

洎其器反或音冀廣韻又音帛

注洎謂增其沃汁

疏按特牲少牢尸尊不就洗入門北面則以盤匱

盥手王盥謂將獻尸時洎鑊水鑊在門外之東亨  
實鑊水此官增之示敬而已此直言祀五帝其餘  
祭祀則小祝職云大祭祀沃尸盥小臣職云大祭  
祀朝覲沃王盥是也鬱人凡裸事沃盥惟在宗廟  
為裸時

凡剗珥則奉大牲

剗音機劉音奇珥而志反註珥同

注珥讀為珥剗珥釁禮之事用牲毛者曰剗羽者曰  
珥

諸侯為賓則帥其屬而蹕于王宮

注謂諸侯來朝若燕饗時

疏其屬謂當官上士已下經云蹕于王宮饗在廟  
燕在寢言于王宮故知燕饗時也

大喪亦如之

疏大喪在宮中蹕者謂朝廟

大師帥其屬而禁逆軍旅者與犯師禁者而戮之

注逆軍旅反將命也犯師禁干行陣也

歲終則令正要會正歲帥其屬而憲禁令于國及郊野  
訓禁戒所以使民不至於刑罰故在職守鄉合之  
法皆施於未刑罰之先亦禁戒之屬也故次之官  
中政令即大司寇小司寇所陳是也上文已見不  
必重言總曰政令而已掌政令而察獄訟之辭以  
佐助輕重斷獄此則刑罰之條也故又次之八成  
獄之不待聽者也故又次之大抵經文次第綱領  
在前條目在後職要者在前職詳者在後至於司



寇之官則又儆戒禁令之屬居前而刑殺戮辱之事居後荒貶之法則又非常時所施故最後也

鄉士掌國中

注國中距王城百里內也六鄉之獄在國中

各掌其鄉之民數而糾戒之

注鄉士八人言各者四人而分主三鄉

疏言各則有部分故以四人分主三鄉解之

聽其獄訟察其辭辨其獄訟異其死刑之罪而要之旬

而職聽于朝

注辯異謂殊其文書也要之為其罪法之要辭如今  
効矣十日乃以職事治之於外朝容其自反覆

疏辯其獄訟獄謂爭罪訟謂爭財文書有異死刑  
之罪者死與四刑文書亦異也注云容其自反覆  
者恐囚虛承其罪十日不讎卽是其實然後向外  
朝對衆更詢乃與之罪

司寇聽之斷其獄弊其訟于朝羣士司刑皆在各麗其

法以議獄訟

注各麗其法者各依其罪不得濫出濫入

獄訟成士師受中協日刑殺肆之三日

注受中謂受獄訟之成也士師既受獄訟之成鄉士則擇可刑殺之日至其時而往涖之尸之三日乃反也

疏肆之三日據死者言其四刑之類行訖即放不須肆之其肆之也大夫於朝士於市鄭云鄉士擇

可刑殺之日而往泣之者士師總攝諸士但士師受中所刑殺者則鄉士遂士等各自往泣之訓按各麗其法謂之各者當刑當殺各異也協日刑殺亦是或刑或殺肆之三日乃專指殺

若欲免之則王會其期

注免猶赦也期謂鄉士職聽于朝司寇聽之日王欲赦之則用此時親往議之訓按欲免之屬蓋所謂議親議貴者是也

大祭祀大喪紀大軍旅大賓客則各掌其鄉之禁令帥

其屬夾道而蹕

夾占  
洽反

注屬中士以下

疏大祭祀若祭天及迎氣皆於郊此四者並過六

鄉路故掌其禁令而蹕也

三公若有邦事則為之前驅而辟其喪亦如之

為于偽  
反遂士

縣士訝  
士職同

疏其喪亦如之謂公卿大夫之喪死於此者

凡國有大事則戮其犯命者

疏大事謂征伐田獵之事故有犯命刑戮之事也

遂士掌四郊

注謂距王城百里以外至二百里言掌四郊者六遂之獄在四郊

各掌其遂之民數而糾其戒令

注遂士十二人言各者二人而分主一遂

聽其獄訟察其辭辨其獄訟異其死刑之罪而要之二

旬而職聽于朝司寇聽之斷其獄弊其訟于朝羣士司刑皆在各麗其法以議獄訟獄訟成士師受中協日就郊而刑殺各於其遂肆之三日

注言各於其遂者四郊六遂遂處不同

若欲免之則王令三公會其期

訓按命三公六卿者王不得逐期身親故使公卿分勞

若邦有大事聚衆庶則各掌其遂之禁令帥其屬而蹕

疏此在四郊之外無祭祀喪紀惟有軍旅賓客田  
役有聚衆庶之事故總云大事聚衆庶也

六卿若有邦事則為之前驅而辟其喪亦如之凡郊有  
大事則戮其犯命者

縣士掌野

注距王城二百里以外至三百里曰野三百里以外  
至四百里曰縣四百里以外至五百里曰都都縣野  
之地其邑非王子弟公卿大夫之采地則皆公邑也



謂之縣縣士掌其獄焉言掌野者郊外曰野大總言之也獄居近野之縣獄在二百里上縣之縣獄在三百里上都之縣獄在四百里上

各掌其縣之民數糾其戒令而聽其獄訟察其辭辨其獄訟異其死刑之罪而要之三旬而職聽于朝司寇聽之斷其獄弊其訟于朝羣士司刑皆在各麗其法以議獄訟獄訟成士師受中協日刑殺各就其縣肆之三日若欲免之則王命六卿會其期若邦有大役聚衆庶則

各掌其縣之禁令若大夫有邦事則為之前驅而辟其喪亦如之凡野有大事則戮其犯命者

方士掌都家

注都王子弟及公卿之采地家大夫之采地大都任  
置地小都任縣地家邑任稍地不言掌其民數民不  
純屬王

疏縣士掌三等公邑之獄方士掌三等采地之獄  
且縣士掌三等公邑之獄親自掌之若方士掌三

等采地之獄則遙掌之采地自有都家之士掌獄  
有事上於方士耳

聽其獄訟之辭辨其死刑之罪而要之三月而上獄訟  
于國

注三月乃上要又變朝言國以其自有君異之  
司寇聽其成于朝羣士司刑皆在各麗其法以議獄訟  
注成平也

獄訟成士師受中書其刑殺之成與其聽獄訟者

注都家之吏自協日刑殺但書其成與治獄之吏姓名備反覆有失實者

凡都家之大事聚衆庶則各掌其方之禁令

注方士十六人言各掌其方者四人而主一方也其方以王之事動衆則為班禁令焉

以時脩其縣法若歲終則省之而誅賞焉

注縣法縣師之職也其職掌邦國都鄙稍甸郊野之地域而辨其夫家人民田萊之數及其六畜車輦之

稽方士以四時脩此法歲終又省之則與掌民數亦相近

凡都家之士所上治則主之

注所上治謂獄訟之小事不附罪者也主之告于司寇聽平之

訝士掌四方之獄訟

注四方諸侯之獄訟

諭罪刑于邦國

注告曉以麗罪及制刑之本意

凡四方之有治於士者造焉

造七報反

注謂獻疑辦事先來詣乃通之於士也士主謂士師也

四方有亂獄則往而成之

注亂獄謂若君臣宣淫上下相虐者也往而成之猶呂步舒治淮南獄

邦有賓客則與行人送逆之入於國則為之前驅而辟

野亦如之居館則帥其屬而為之蹕誅戮暴客者客出

入則道之有治則贊之

道音導

注送逆謂始來及去也出入謂朝覲于王時也春秋傳晉侯受策以出出入三覲

凡邦之大事聚衆庶則讀其誓禁

疏大事征伐之等訝士讀誓命及五禁之法也

朝士掌建邦外朝之法左九棘孤卿大夫位焉羣士在其後右九棘公侯伯子男位焉羣吏在其後面三槐三

公位焉州長衆庶在其後左嘉石平罷民焉右肺石達

窮民焉

長丁丈反  
罷音皮

注樹棘以為位者取其赤心而外刺象以赤心三刺也槐之言懷也懷來人於此欲與之謀羣吏謂府史也州長鄉遂之官鄭司農云王有五門外曰臯門二曰雉門三曰庫門四曰應門五曰路門路門一曰畢門外朝在路門外內朝在路門內玄謂明堂位說魯公宮曰庫門天子臯門雉門天子應門言魯用天子



之禮所名曰庫門者如天子臯門所名曰雉門者如  
天子應門則魯無臯門應門矣檀弓曰魯莊公之喪  
既葬而經不入庫門言其除喪而反由外來是庫門  
在雉門外必矣如是王五門雉門為中門雉門設兩  
觀與今之宮門同閭人幾出入者窮民蓋不得入也  
郊特牲譏繹於庫門內言遠也禮當於廟門廟在庫  
門之內見於此矣然則外朝在庫門之外臯門之內  
與周天子諸侯皆有三朝外朝一內朝二內朝之在

路門內者或謂之燕朝

帥其屬而以鞭呼趨且辟禁慢朝錯立族談者

趨本又作趣同

七須反劉音清欲反

注慢朝謂臨朝不肅敬也

疏族聚也

凡得獲貨賄人民六畜者委于朝告于上旬而舉之大者公之小者庶民私之

注俘而取之曰獲委於朝十日待來識之者人民謂

刑人奴隸逃亡者大者公之大物沒入公家也人民  
之小者未亂七歲以下

凡士之治有期日國中一旬郊二旬野三旬都三月邦  
國期期內之治聽期外不聽

疏此即上鄉士之等獄訟成來於外朝職聽期外  
不聽所以省煩息訟也

凡有責者有判書以治則聽

注判半分而合者鄭司農云謂若今時辭訟有券書

者為治之玄謂古者出責之息亦如國服與

凡民同貨財者令以國法行之犯令者刑罰之

注鄭司農云同貨財者謂合錢共賈者也以國法行之司市為節以遣之玄謂同貨財者富人蓄積者多時收斂之乏時以國服出之雖有騰躍其贏不得過此過此則罰之若今時加貴取息取息坐臧訓按此同貨財即泉府所謂同貨斂賒文既不異故以泉府斂售之法解之

凡屬責者以其地傳而聽其辭

屬如字或音燭傳音付

注屬責轉責使人歸之而本主死亡歸受之數相抵冒者也以其地之人相比近能為證者來乃受其辭為治

疏轉責使人歸之者謂有人取他責乃別轉與人使子本依契而還財主也歸受之數相抵冒者後受責之人見轉責者死亡詐言所受時少是相抵冒也

凡盜賊軍鄉邑及家人殺之無罪

注盜賊羣輩若軍共攻鄉邑及家人者殺之無罪

凡報仇讐者書於士殺之無罪

注謂同國不相辟者將報必先言於士

若邦凶荒札喪寇戎之故則令邦國都家縣鄙慮刑貶  
注慮謀也貶猶減也謂當圖謀緩刑且減國用為民  
困也所貶視時為多少之法

疏所貶視時多少者凶荒之事重則所貶多事輕

則所貶少也訓葉氏少蘊曰周有三朝一曰燕朝  
在路門之內王圖宗人嘉事之朝也大僕小臣掌  
焉一曰治朝在路門之外王日聽治之朝也宰夫  
司士掌焉一曰外朝在庫門之外詢萬民聽政之  
朝也小司寇朝士掌焉外朝之位百姓衆庶固得  
與公侯卿士羣吏相可否若夫治朝之位司士正  
其儀宰夫掌其法而庶民之逆得與諸臣之復賓  
客之治同徹于天子之前又未嘗以嚴禁為限矣

燕朝之法則大僕掌諸侯之復逆小臣掌三公孤卿之復逆御僕掌羣吏庶民之復逆而大僕復建路鼓于大寢門外以待達窮與遽令則逆御僕聽其所陳而白于王又未嘗以遽深為隔矣然外朝雖掌于司寇朝士而三公孤卿在焉則大宰與聞外朝之政矣治朝雖掌於司馬司士而宰夫掌其禁冢宰贊其治則大宰實參治朝之事矣燕朝雖亦夏官之屬然羣臣之復逆宰夫與有職焉況大



僕雖掌燕朝而王視治朝之時則大僕正其位王  
不視朝則辭於三公及孤卿是燕朝之人實與治  
朝相通則大宰亦與聞乎燕朝之政矣以此見成  
周之治宮中府中俱為一體而無內外之分也

司民掌登萬民之數自生齒以上皆書於版辨其國中  
與其都鄙及其郊野異其男女歲登下其死生及三年  
大比以萬民之數詔司寇司寇及孟冬祀司民之日獻  
其數于王王拜受之登于天府內史司會冢宰貳之以

贊王治

注司民軒轅角也三官以貳佐王治者當以民多少  
黜陟王民之吏

疏軒轅有十七星如龍形有兩角角有大民小民  
司刑掌五刑之法以麗萬民之罪墨罪五百劓罪五百

宮罪五百剕罪五百殺罪五百

剕魚器反李魚介反  
刑音月又五刮反

注墨黥也先刻其面以墨窒之劓截其鼻也宮者丈夫  
則割其勢女子閉於宮中若今宦男女也剕斷足

也周改贖作刖殺死刑也書傳曰決闕梁踰城郭而  
畧盜者其刑贖男女不以義交者其刑宮觸易君命  
革輿服制度姦軌盜攘傷人者其刑劓非事而事之  
出入不以道義而誦不詳之辭者其刑墨降畔寇賊  
刼畧奪攘擄虔者其刑死此二千五百罪之目畧也  
其刑書則亡夏刑大辟二百贖辟三百宮辟五百劓  
墨各千周則變焉所謂刑罰世輕世重者也

疏按左傳史克云在九刑不亡鄭注堯典云正刑

五加之流宥鞭扑贖刑此謂九刑漢文帝所赦肉刑惟赦墨劓與剕三者其官刑至隋乃除也

若司寇斷獄弊訟則以五刑之法詔刑罰而以辨罪之輕重

司刺掌三刺三宥三赦之法以贊司寇聽獄訟

刺七賜反

注刺殺也訊而有罪則殺之宥寬也赦舍也

壹刺曰訊羣臣再刺曰訊羣吏三刺曰訊萬民壹宥曰不識再宥曰過失三宥曰遺忘

注識審也不審若今仇讐當報甲見乙誠以為甲而殺之者過失若舉刃欲斫伐而軼中人者遺忘若閒惟薄忘有在焉而以兵矢投射之

壹赦曰幼弱再赦曰老旄三赦曰蠢愚

旄耄同亡報反  
蠢頁卷反廣韻

音春書  
容切

注蠢愚生而癡騃童昏者

疏三赦與前三宥所以異者三宥是過誤所作雖非故心比三赦為重據今仍使出贖此三赦之等

此上為輕全放無贖老耄幼弱案曲禮云悼與耄雖有罪不加刑焉是也

以此三法者求民情斷民中而施上服下服之罪然後刑殺

司約掌邦國及萬民之約劑治神之約為上治民之約次之治地之約次之治功之約次之治器之約次之治

摯之約次之

約於妙反

注此六約者諸侯以下至於民皆有焉劑謂券書也

治者理其相抵冒上下之差也神約謂命祀郊社羣  
望及所祖宗也夔子不祀祝融楚人伐之民約謂征  
稅遷移仇讐既和若懷宗九姓在晉殷民六族七族  
在魯衛皆是也地約謂經界所至田萊之比也功約  
謂王功國功之屬賞爵所及也器約謂禮樂吉凶車  
服所得用也摯約謂玉帛禽鳥相與往來也

凡大約劑書於宗彝小約劑書於丹圖

注大約劑邦國約也書於宗廟之六彝欲神監焉小

約齊萬民約也丹圖未聞或有彫器簠簋之屬有圖象者與春秋傳曰斐豹隸也著於丹書今俗語有鐵券丹書豈非舊典之遺言

若有訟者則珥而辟藏其不信者服墨刑

辟闢通下六官辟藏倣此

注訟訟約若宋仲幾薛宰者也辟藏開府視約書不信不如約也珥讀曰衄謂殺雞取血釁其戶

若大亂則六官辟藏其不信者殺

注大亂謂僭約若吳楚之君晉文公請隧以葬者六



官辟藏明罪大也六官初受盟約之貳

司盟掌盟載之法

注載盟辭也盟者書其辭於策殺牲取血坎其牲加書於上而埋之謂之載書

凡邦國有疑會同則掌其盟約之載及其禮儀北面詔明神既盟則貳之

注有疑不協也明神謂日月山川也覲禮加方明于壇上所以依之也詔之者讀其載書以告之也貳之

者寫副當以授六官訓愚謂貳即在司盟故曰載在盟府其正則與牲俱埋矣

盟萬民之犯命者詛其不信者亦如之

詛側  
慮反

注盟詛者欲相與共惡之也犯命犯君教令也不信違約者也如春秋傳盟臧氏及鄭伯詛射潁考叔者凡民之有約劑者其貳在司盟

疏此謂司約副寫一通來入司盟

有獄訟者則使之盟詛

注不信則不敢聽此盟詛所以省獄訟

凡盟詛各以其地域之衆庶共其牲而致焉既盟則為  
司盟共祈酒脯

注使其邑閭出牲而來盟已又使出酒脯司盟為之  
祈明神使不信者必凶

周禮纂訓卷十九